

19 OCT 2001

Belanjawan-Belia

KERAJAAN SEDIA RM81.8 JUTA UNTUK PROGRAM BELIA

KUALA LUMPUR, 19 Okt (Bernama) -- Kerajaan memperuntukkan sejumlah RM81.8 juta untuk meningkat dan memperluaskan Program Rakan Muda dan Program Khidmat Sosial Negara dalam Belanjawan 2002.

Perdana Menteri Datuk Seri Dr Mahathir Mohamad ketika membentangkan Belanjawan 2002 di Dewan Rakyat hari ini berkata, Program Rakan Muda akan diteruskan dengan pengisian baru dan akan dijadikan agenda nasional untuk membantu menangani masalah negara.

"Seramai 3.5 juta belia dalam lebih 35,250 aktiviti di peringkat nasional, negeri dan daerah akan terlibat dengan program ini," katanya.

Di samping itu, Dr Mahathir yang juga Menteri Kewangan berkata Program Khidmat Sosial akan diperluaskan penyertaannya kepada 20 ribu remaja.

Dr Mahathir berkata program itu bertujuan membina jatidiri dan membentuk perilaku yang baik untuk golongan remaja, dan ia ditujukan pada pelajar yang sedang menunggu keputusan peperiksaan Sijil Pelajaran Malaysia (SPM).

Selain itu, Dr Mahathir berkata Program Rakan Muda perlu diatur secara berterusan bagi menarik minat golongan remaja menyertai aktiviti yang sesuai dengan citarasa mereka.

Bagi pihak kerajaan, Dr Mahathir juga merakamkan setinggi-tinggi tahniah terhadap pencapaian cemerlang kontinjen Sukan SEA negara yang berjaya memperolehi 111 pingat emas.

"Latihan untuk atlet negara akan diteruskan secara lebih serius supaya prestasi negara dalam Sukan Asia dan Olimpik akan cemerlang," katanya.

Beliau berkata kerajaan juga akan memperluaskan aktiviti sukan, rekreasi dan kecerdasan dengan mengadakan lebih banyak aktiviti yang berbentuk pertandingan di peringkat akar umbi melalui konsep sukan untuk semua.

"Selain itu, sukan baru seperti sukan lasak dan sukan bermotor akan terus diperkenalkan melalui pertandingan dan penganjuran sesi demo," katanya.

Beliau berkata pada tahun 2002 Malaysia akan menjadi tuan rumah sukan lasak peringkat Asia yang dijangka menarik minat generasi muda untuk mengisi masa lapang dengan kegiatan yang berfaedah.

-- BERNAMA

MUN ZS PR